

HARTAWAN MAKKAH AL-MUKARRAMAH MEWAKAFKAN KEBUNNYA KEPADA MADRASAH MI RIYYAH SEBERANG PRAI
MENTERI NEGARA SAUDI ARABIA AL-SAYYID ASSAN AL-SHARBATLĪ YANG DERMAWAN.



Gambar yang tertera di sini ialah wajah Yang Berhormat Menteri Negara Saudi Arabia, Tuan al-Sayyid Hassan al-Sharbatlī *Makkah al-Mukarramah* yang telah mewakafkan sebuah ladang getah di Pantai Estet Bukit Mertajam baharu-baharu ini kepada al-Madrasah al-Miṣriyyah Bukit Mertajam. Ladang itu berharga \$23,714.00 (dua puluh tiga ribu tujuh ratus empat belas ringgit).

Pihak Madrasah Miṣriyyah bahkan umat Islam se-Malaya adalah menyambut kemurahan hati beliau ini dengan segala rasa kebanggaan, di mana seorang yang beribu-ribu batu jauhnya telah mengambil berat atas pembangunan pelajaran Islam di Tanah Melayu dengan memberikan sumbangan yang begitu besar.

Pengorbanan yang seperti ini sesungguhnya amat memberikan kesan kepada umat Islam Tanah Melayu terutamanya kepada penganjur-penganjur Islam dan pembangunan-pembangunan pelajaran agama Islam. Dan lebih tepatnya kepada pemimpin-pemimpin sekolah agama rakyat yang telah lama benar mengorbankan apa sahaja yang terdaya

oleh mereka dan yang telah menderita sepanjang masa yang lalu berkait pembangunan Islam di Tanah Melayu di dalam mana mereka juga telah merasai pada masa-masa yang lampau itu diri mereka sebagai terlalu dagang terhadap usaha-usaha yang dilancarkan oleh mereka. Tetapi dengan sumbangan tuan Yang Berhormat ini kembalilah bernyala-nyala semangat pengorbanan itu di jiwa mereka. Kerana ini adalah membuktikan bahawa umat Islam seluruh dunia ada beserta mereka.

Dan pihak Madrasah Miṣriyyah adalah mempersembahkan kepada beliau ucapan kesyukuran yang tak ternilai seraya mendoakan moga-moga Allah limpahkan kemakmuran yang berganda-ganda kepada beliau serta mengurniakan dia setinggi-tinggi darjat di dunia dan akhirat.

Seyogialah dinyatakan bahawa dengan ini maka dua buah ladang getah telah diwakafkan kepada Madrasah Miṣriyyah baru-baru ini iaitu sebuahnya diwakafkan oleh ahli-ahli dermawan Semenanjung Tanah Melayu dan Singapura seluas dua puluh ekar kurang suku dan ini seluas empat belas ekar yang kedua-duanya dibeli daripada pecahan estet Pantai, Bukit Mertajam.

Moga-moga bertambah banyak lagi hartawan-hartawan Islam yang mahu berkorban kerana agama Allah.